

四庫全書

史部

欽定四庫全書

西湖志纂卷六

大學士梁詩正等輯

南山勝蹟下

出清波門折而南由方家峪過慈雲嶺經龍
山至開口為南山中路

筆架山 在清波門南上有三峯狀如筆架

方家峪 在清波門外路通慈雲嶺

華津洞

在方家峪成化杭州府志巖戶靚深

石色如翠螺蒼玉清氣沁人盛夏無暑西湖遊
覽志宋時有趙冀王園水石奇秀花竹蕃鮮有
仙人棋臺在焉

觀音洞

在方家峪鳳凰山後內有觀音石像

秦觀觀音洞詩匹馬驕嘶石路斜觀音洞口
踏煙霞普陀風景差相似只欠潮音小白花

張宣公祠

在方家峪杭州府志祀宋儒南軒

張栻祠舊在尉司下扇里萬厯甲辰移建今處

錢塘知縣聶心湯為記

忠節祠 在方家峪萬厯杭州府志祀宋贈秘閣修撰徐應鑣武林紀事德佑二年元師次皋亭山宋主率三宮庶寮三學諸生北行應鑣與二子鄉貢士曰琦曰崧女元娘皆不從死於井贈朝奉秘閣修撰弘治十八年賜祭正德十一年知府梁材奏請立祠有司春秋致祭

西林法惠院 在方家峪咸淳臨安志乾德元

年吳越忠懿王建舊名興慶大中祥符中改今

額咸淳臨安志慶厯間禪師法言作西軒蘓子

瞻見而愛之題曰雪齋

蘇軾雪齋詩君不見我眉山雪千里北望城

都如井底春風百日吹不消五月行人如凍蟻紛紛市人爭奪中誰信言公似贊公人言熱惱無處洗故向西齋作雪峯我夢扁舟適吳越長廊淨院燈如月開門不見人與牛惟見空庭滿

雪山

橫翠閣

在法惠院內

蘇軾橫翠閣詩朝見吳山橫暮見吳山

故多態轉側為君容幽人起朱閣空洞更無物惟有千步岡東西作簾額春來故國歸無期人

言悲秋春更悲已泛平湖思濯錦更看橫翠憶
峨眉凋欄能得幾回好不獨憑欄人易老百年
興廢更堪哀懸知草莽化池臺遊
人尋我舊遊處但覓吳山橫處來

褒親崇壽寺

在鳳凰山後方家峪咸淳臨安

志紹興十八年建賜褒親崇壽額西湖遊覽志

俗稱劉孃子寺劉貴妃父因金人南侵獻錢二

萬緡以助軍費高宗嘉之遂令建寺以為功德

有松雪亭偃龍交枝檜壁間有陳公儲畫龍甚

奇元至元丙子火重建元末又燬正統間僧曇

芳重建

慈雲嶺 在方家峪東西湖遊覽志龍山之支
脈也石壁間篆刻梁單閼之歲興建龍山至湑
灘之歲開慈雲嶺十八字

國朝乾隆十六年春

聖駕巡幸

御製慈雲嶺詩

橫界南屏翠鬱蔥淨慈低在白雲中穿雲度嶺招

提隱暖入春衣曉日紅

鳳凰泉 在慈雲嶺下四朝聞見錄泉自鳳山

而下注為方池味甚甘美上揭鳳凰泉三字于
湖張孝祥書

江湖偉觀亭 在慈雲嶺上

梯雲嶺 在慈雲嶺東西湖遊覽志嶺下舊有

水月寺宋太平興國二年建元末燬有水月池

靈固石

蘇軾梯雲嶺詩千尺長松掛女蘿梯雲
嶺上一聲歌湖山深隱在何處水月池

中桂

影多

龍山 在慈雲嶺南西湖遊覽志一名卧龍山
又名龍華與上下石龍相接去城南十里許天
目分支沿江而東結局於此蜿蜒若游龍山北
有鴻雁池其東為白塔嶺

天真禪寺 在龍山上咸淳臨安志龍德元年
吳越王建舊名登雲臺大中祥符元年改今額
下天真寺 在龍山下今為勲賢祠武林梵志

與包山聯界宋高宗朝建明洪武年普正大師
重建

勲賢祠 在天眞之陽萬厯杭州府志祀新建
伯王守仁嘉靖九年行人薛侃參議王臣等僉
謂新建嘗修業於茲書貽同志醵金構精舍祀
之萬厯七年議毀天下書院十二年巡撫都御
史蕭廩巡按御史蕭鳴謙合請於朝復祀賜額
盡贖故祀田還之祠中有司以歲之春秋仲次

丁日有事祠下錢塘縣志萬厯中知縣聶心湯
重建太極亭補刻陽明全書清理租稅以供諸
生講學之費

登雲洞 在天眞院內西湖遊覽志錢武肅王
嘗置登雲臺傍有林逋蘇軾題名

梅花巖 在天龍寺下西湖遊覽志南宋玉津
園內

天龍寺 在龍山之陽宋郊臺之右西湖遊覽

志乾德三年吳越王建以居鏡清禪師宋大中
祥符元年改名感業紹興十三年建園邱以淨
名為齋宮感業居從官僧徒漸散而寺亦圯元
延祐間僧道平重建至正間南北兩山諸刹或
燬或圯惟天龍僅存有堂曰山舟貫雲石書

龍華寺 在龍山西湖遊覽志吳越王錢氏以

瑞萼園捨建有傳大士塔像及拍板門槌並司

馬溫公祠堂今皆不存

蘇軾大士像贊善慧執
板南泉作舞偈我門槌

為君打鼓
元末燬明宣德四年重建

勝相寺 在龍山咸淳臨安志唐開成四年建
名龍興千佛寺治平間賜今額建炎兵燬止存
五丈觀音像及閣武林梵志俗稱五丈寺明萬
歷間僧如準重建

育王山 在龍山南萬歷錢塘縣志俗呼鍋子
山壁立尖聳特異諸山其頂有玉皇殿

八卦田 在龍山下西湖遊覽志中阜規圓環

以溝塍作八卦狀至今不紊舊傳為宋藉田

妙因山 在龍山南舊有吳越文穆王忠獻王
墓宋表忠觀本建於此明嘉靖間改建湧金門
南

玉廚山 在妙因山稍北西湖遊覽志舊有善
慧禪寺元延祐間建為伏龍禪師道場錢塘縣
志又名伏龍岡山洞多石龍鱗甲悉具

龍山閘 在浙江驛前萬厯杭州府志宋時於

龍山之口置閘以限潮水歲久湮塞元祐三年
行省丞相托克托命民開浚龍山河建石橋立上

下二閘

出清波門折而東迤南過萬松嶺合鳳山門
循鳳凰山經山川壇達錢塘江為南山東路
鳳凰山 在鳳山門外名勝志舊在城內元末
張士誠築城截之於外今沿城南西湖遊覽志
兩翅軒翥左薄湖濱右掠江潯形若飛鳳山下

為吳越國治內附後為州治迨南宋建都茲山
東麓環入禁苑

萬松嶺 在鳳山門外名勝志自唐至宋夾道
植松嶺口有門曰萬松坊金臺王玘書

國朝乾隆十六年春

聖駕巡幸

御製萬松嶺詩

見恭紀
名勝

敷文書院 在萬松嶺上本名萬松書院宋為

報恩寺元廢明弘治十一年浙江右參政周木
因寺址改建書院奉宋太學宣聖石像於此立
石坊題曰太和元氣上有芙蓉巖可汲亭石匣
泉稍西有水雲亭振衣亭中為飛躍軒西有留
月臺東有掬湖臺中有毓秀閣又西有如圭峯
正中為明道堂右為居仁齋左為由義齋又有
顏樂亭曾唯亭後祀嘉靖三十三年杭州知府
孫孟重建萬曆五年巡鹽御史馬應夢即毓秀

閣北建繼道堂翼以窮理居敬二齋歲久復圯
國朝康熙十年巡撫范承謨重建康熙五十五年
巡撫徐元夢奉

聖祖仁皇帝御書浙水敷文四大字恭懸堂中並勒石
焉後為正誼堂為存誠閣迤西巖上有亭巡撫
朱軾顏曰玩心高明又前有軒顏曰表裏洞然
稍西有載道亭督學汪濬題曰與灝氣俱登山
遐矚左江右湖如在襟帶中多奇石不可名狀

雜植桃李桂杏之屬繁英繽紛綠陰晷歷足為
藏修息游之所雍正十一年

命省會創建書院給帑金以資膏火

頒賜經籍延師督課俾十一郡諸生肄業其中乾隆元
年欽奉

諭旨慎選師儒以居講席月有課日有程兩浙人文
蔚起乾隆十六年三月初三日

駕由淨慈寺過萬松嶺

臨幸書院

御製題敷文書院詩

松岡迴首望祇園講舍層階喜得門氣助湖山鍾
遠秀道傳孔孟有真源清遊祇欲心無逸名教何
非樂所存嘉爾青衿真濟濟嗣音實行勉相敦
多士懼忤鼓舞恭和

奎章進

呈俱蒙

召試西湖

欽取謝墉陳鴻寶王又曾三人

特賜舉人授為內閣中書餘俱各蒙

恩賚誠隆古以來士林未遇之曠典也

報先菴 在萬松書院東武林梵志萬曆己亥

建

報恩寺 在萬松嶺上西湖遊覽志嶺上舊有

報恩寺唐元貞間建元至正間築城移建城內

明成化間仍移故址內有浣雲池萬菊軒武林
梵志萬歷壬子移建於楊梅嶺名報恩菴

浣雲池

在報恩寺內

白居易浣雲池詩白雲
本無心舒卷長自潔影

落一鑑空可浣不可涅鳶飛魚躍間上
下俱澄澈此意難與言覽之自怡悅

萬菊軒

在報恩寺內久圯

蘇軾萬菊軒詩一
軒專為黃花設富

擬人間萬石君佳本盡從方外得異香多在月
中聞引泉北澗分清露開徑南山破白雲此意
欲為知者道陶
潛猶是未離羣

八蟠嶺

在萬松嶺右過北而南可通月巖

樓

賀雪八蟠嶺上作平時臥雪似袁安誰肯凌晨
犯曉寒百辟班中同簇賀八蟠嶺上得遙看層
層觀調瓊樓聳納納乾坤玉宇寬悵
望仙山何處是欲從此地徑驂鸞

郭公井 在萬松嶺上西湖遊覽志相傳晉郭
璞所鑿其時杭地皆瀕江斥鹵艱於甘泉故地
脉非璞不能識鐵冶嶺亦有郭璞井

徐復故居 北窗炙輠錢塘處士徐復號沖晦
先生居萬松嶺上孫忉猶守故廬嘗語人曰先
祖有言子孫世世勿離錢塘永無兵燹徐故精

於數學也

鳳山門 在吳山南近鳳凰山故名

宋時名嘉會門元曰和寧門以其當城之正南
故俗呼正陽門

玉津園 咸淳臨安志在嘉會門外紹興十七
年建孝宗數臨幸焉命羣臣燕射於此西湖遊
覽志玉津汴京園名也陸務觀有過玉津園詩
報國寺 在鳳山門外過萬松坊南西湖遊覽

志元至元中僧嘉木揚喇勒智請即宋故內建
五寺曰報國曰興元曰般若曰僊林曰尊勝報
國寺即垂拱殿興元寺即芙蓉殿般若寺即和
寧門僊林寺即延和殿尊勝寺即福寧殿延祐
至正間諸寺遞燬明洪武二十四年重建報國
寺蓋宋行宮故址即錢王舊宮也

大悲閣 在報國寺內今為映壁菴報國寺志
舊名梳粧臺傳是宋宮人梳粧處後改為大悲

閣供千手觀音像明天啟間燬

國朝順治己亥重建

杭州府志報國寺有宋梳粧樓遺蹟

白塔 西湖遊覽志在尊勝寺即鎮南塔元至

元中嘉木楊喇勒智建以厭勝形如壺俗呼一

瓶塔壘飾如雪故又稱白塔至正末為張士誠

所毀其寺鐘即宋禁內故物也其下至今有尊

勝卷

臣謹按龍山白塔有二范仲淹過餘杭白塔寺詩云登臨江上寺遷客兩依依又王鉉云余與

郭壽翁別於錢塘追送至龍山白塔寺又錢惟善白塔詩宋宮傳是唐朝寺白塔崔嵬寢殿中是龍山白塔建於唐代南宋時環入禁中故不載於咸淳志而後之作志者遂失之西湖遊覽志惟以鎮南塔為白塔而不詳龍山之白塔寺楊漣之塔復毀於張士誠故貝瓊詩云江頭白塔今不見則併鎮南塔亦無存矣

梵天寺 在鳳凰山萬松坊西南西湖遊覽志
宋乾德中吳越錢氏建名南塔治平間改今額
元統中燬明永樂十五年重建有石塔二靈鰻
井金井先是四明阿育王山有靈鰻井吳越王

迎阿育舍利歸梵天寺鑿井南廊鰻忽見

僧守詮梵

天寺詩落日寒蟬鳴獨歸林下寺柴扉夜未掩
片月隨行屨惟聞犬吠聲又入青蘿去蘇軾梵
天寺和僧守詮詩但聞煙外鐘不見煙中寺幽
人行未已草露濕芒屨惟應山頭月夜夜照來
去

金星洞

在鳳凰山介亭下洞生金星草因名

蘇軾金星洞銘寶山南麓鳳左翅驚雷劃石逋
蚪起疑陰噓堅出怪瑋是生神草肖蒼虺離離
赤痣挾璿尾飛流丹石決癰瘡金星非寶特
取似施及山石亦見喟凡石相因皆此比

月巖

在鳳凰山七修類藁山上有石如片雲

拔地高數丈巔有一竅尺餘名曰月巖惟中秋
之月穿巖而出十四十六則否西湖遊覽志旁
有月榭

中峯 在月巖之左西湖遊覽志中為中峯峯
上有亭曰天峯孤嘯峯後有三佛石仙姑洞郭
公泉醉卧石放光石

排衙石 在鳳凰山右咸淳臨安志山巔石筍
林立舊傳錢武肅王鑿山見石排立兩行如從

衛拱立趨向因名

宋御教場 夢梁錄在鳳凰山八蟠嶺即殿前
司營中置衛有御書閣疑香堂整暇堂山上有
亭曰延桂山最高處曰介亭崖石嶙峋有冲天
樓極高為江湖偉觀西湖遊覽志殿前司為宋
親軍護衛之所俗稱御教場山頂有石即錢氏
排衙石第二峯有白塔塔西小徑石壁夾道可
通往來名曰石衙宋初名人多題刻其間相傳

為南宋隧道非是

臣謹按御教場又名女教場傳是南宋六宮習武之地明王問詩紹興初年宋南驚六宮嬌娥避豺虎解却歌舞雜旋把鐵衣著拈弓玉指柔揮戈皓腕弱王守仁詩亦有絕頂秋深草樹平昔年曾此駐傾城之句蓋是時和議未成內外交警或宮人偶有習武之事二詩所稱必非無據也

介亭 在鳳凰山對排衙石咸淳臨安志宋熙寧中郡守祖無擇作天風冷然有縹緲憑虛之意西湖遊覽志唐宋以來州治皆在於此南渡

後改為行宮而萬松八蟠嶺介亭皆列皇城之

外惟州治東南至江干皆屬禁禦舊有虛白堂

中和堂有美堂

有美堂詳見吳山

清暑堂因巖亭忘筌

亭望越亭高齋東樓望海樓清暉樓石林軒雙門並廢

虛白堂 古蹟考在郡圃唐時建後為錢氏都

會堂

白居易虛白堂詩虛白堂前衙退後更無一事到中心移牀就日簷間卧卧咏閒詩

側枕琴趙抃虛白堂詩松蘿瀟灑似居山賓退公餘半是閒誰謂樂天虛白意只傳詩句落人

間

中和堂 成化杭州府志即錢武肅王閱禮堂

宋至和三年守孫沔重建名曰中和後改為偉

觀趙抃中和堂詩老來重守鳳凰城千里人心
豈易平樂職古賢形歎頌中和終不負虛名

清暑堂 咸化杭州府志宋治平三年守蔡襄

建

忘筌亭 名勝志在郡圃唐時建白居易忘筌
亭詩翠巘公

門對朱軒野徑連只開新戶牖不改舊雲煙虛
室閒生白高情淡入玄酒客同座勸詩就滿城

傳自笑滄江畔遙思絳帳前
亭臺隨事有爭得比忘筌

望越亭 咸淳臨安志慶厯三年郡守蔣堂建

名南園巽亭政和初守張閣移建於此曰望越

趙抃宴望越亭守陳給事詩望越亭無一點塵
迢迢東首坐疑神雨餘岫色濃於黛日出波光
爛若銀我類武陵歸去客君為蓬島上頭人
誰知老守吾鄉便得與詩翁作善隣

高齋 避暑錄話州宅之東據城闌為屋下瞰

虛白堂超出州宅故為州者多居之謂為高齋

嚴維九日高齋詩詩家九日憐芳菊遲客高齋
對浙江漁浦浪花揺素壁西隣樹色入秋牕木

奴向熟懸金寶桑落新開瀉玉缸四子醉時爭
講德笑論黃霸屈為邦白居易初到郡齋寄錢
湖州李蘇州詩俱來滄海郡半作白頭翁漫道
風煙接何曾笑語同吏翰秋稅畢客散晚亭空
霽後當樓月潮來滿座風雪溪殊冷僻
茂苑太繁雄惟此錢塘郡忙閒却得中

東樓 太平寰宇記高十丈唐武德七年置圖

經一名望海樓在中和堂北

白居易初領郡衙退登東樓作鰥悖心

所念簡牘手自操何言符竹貴未免州縣勞賴
是餘杭郡臺榭繞官曹凌晨親政事向晚恣遊
遨山冷微有雪波平未生濤水心如鏡面千里
無纖毫直下江寂濶近東樓更高煩襟與滯念

一望皆
遁逃

清暉樓

古蹟考在舊州治唐守嚴維建

白居易清

暉樓詩嚴郎制茲樓立名曰清暉未及題花榜
遽催還粉闌去來三四年塵土登者稀今年新
太守掃灑施簾帷院柳煙婀娜簷花雪霏微看
山倚西戶待月闌東扉碧牕戛瑤瑟朱欄飄舞
衣燒香捲簾坐風燕一雙飛君作不得住
我來幸相依始知天地間靈境有所歸

石林軒

名勝志燕思閣宋至和中守孫沔立

有石七株號七賢石元祐中守蒲宗孟改名石

林軒

隱秀齋

名勝志在府治通判北廳蘇軾書額

雙門 成化杭州府志吳越錢氏之子城宋至
和初守孫沔重立蔡襄有記

吳越鎮海軍使院 成化杭州府志唐光化三

年吳越王鏐以唐州治擴而大之依山阜為宮

室名鎮海軍使院內有握髮殿都會堂閱禮堂

功臣堂天寵堂天冊堂思政堂武功堂天長樓

疊雪樓青史樓碧波亭宋自錢氏納土即使院

為州治至高宗立為行都徙州治於清波門北

都會堂 吳越備史武肅王建亭於虛白堂之

基曰八會亭以平吳定越講武計議凡八會於
此已而更名都會堂有蝗蔽日而飛晝為之暝
王親祀於堂是夕大風蝗墮浙江而死歲以有
秋

疊雪樓 成化杭州府志錢武肅王於疊雪樓
架强弩數百以射潮

宋大內 徐一夔宋行宮考在鳳凰山即唐以

來州治宋建炎三年高宗以杭州為行都執政
奏屋宇隘陋高宗以百官六軍未得其所不御
正寢紹興元年詔守臣徐康國措置命不得華
飾二年南門成名行宮之門三年以百官泥雨
非使命梁汝嘉創廊廡於南門之內二十八年
始增築禁城

臣謹按唐宋州治即吳越使院南渡後為行宮
舊志載入南山古蹟茲錄存其概以備考

包家山 在城南近山川壇西湖遊覽志山多

桃花宋時有關名桃花關扁曰蒸霞遊人最盛
號小桃源

冷水峪 在包家山成化杭州府志山多桃花
中有流水為城南勝槩

聖果禪寺 在鳳凰山之右西湖遊覽志唐乾
寧間無著禪師建吳越王鑄三佛及羅漢像於
石壁宋景祐間僧惠然建塔慶厯五年賜額曰
崇聖高宗南渡廢為禁苑明永樂十五年重建

更名勝果內有忠實亭

僧處默聖果寺詩路自中峯上盤迴出薜蘿到

江吳地盡隔岸越山多古木叢青靄遙天浸白波下方城郭近鐘磬雜笙歌

臣謹按咸淳臨安志越境北至於禦兒見左傳杜預注及史記越絕等書故杜佑通典歐陽志輿地廣記皆以杭為越地秦漢時隸會稽郡至順帝永建中始分會稽置吳郡據此則唐人到江吳地盡隔岸越山多之句亦第就唐時言之而乾道淳祐志皆指浙江為自來吳越分界處以杭專屬之吳不若咸淳志考證之詳覈也

山川壇 在包家山側西湖遊覽志洪武元年

擬建於城西二年詔合風雲雷雨共為一壇建

於此

三一菴 在山川壇右萬厯錢塘縣志白玉蟾
煉真於此見石竇中湧泉遂開石池名辟劍池
有神龜出沒西湖遊覽志玉蟾南海人宋乾道
間於黎母山中得道嘉定中召赴行都命主太
乙宮更結菴於此內有得月樓

順濟廟 在江干大觀樓右又名善利院祀善
利龍王自宋至今尚存

昭貺廟 在江干渾水閘內錢塘縣志祀宋兵部尚書張夏神以景祐間為兩浙轉運使江潮為患築石堤自六和塔至東青門延袤十二里杭人德之立祠隄上俗稱張司封廟大觀二年封寧江侯改封英濟公紹興十四年贈靈感三
十年增順濟尋加爵號曰濟靈顯佑威烈安順
王成化間重建

國朝雍正三年

勅封靜安公春秋致祭

資福廟

在江干錢塘縣志祀宋烈文侯張憲

景定二年追封立祠東山街口墓所復為建廟

於江干今稱郡城都土地廟

詳見北山

協順廟

在江干石塚萬厯杭州府志祀宋陸

圭圭昭慶軍人宣和中以真州兵馬都監引兵

進攻方臘死為神紹興間陰却海潮以衛江岸

淳祐中潮圯江岸屢築不就神與三女揚旗空

中浮石江面岸賴以成浙西帥臣徐臬聞於朝
賜廟額封廣陵侯并封三女為顯濟通濟永濟
夫人錢塘縣志三女一主護岸一主起水一主
交澤傍有小廟祀十二潮神各主一時

樟亭驛 在江干輿地志今為浙江亭

孟浩然
與杭州

薛司戶登樟亭驛詩水樓一登眺半出青林高
帶幕英僚聚芳筵下客叨山藏伯禹穴城壓伍
胥濤今日觀溟漲垂綸欲釣鼇鄭谷題樟亭驛
樓詩故國江山外登臨返照間潮來無別浦木
落見他山沙鳥晴飛遠漁人夜
唱閒歲窮歸未得心逐片帆還

鐵幢浦 在江干吳越備史錢武肅王射潮箭

所止處嘗立鐵幢因名鐵幢浦

徐一夔鐵幢考舊臨安志云錢

氏築塘時置鐵幢三以為水則今利津橋北者其一也地名鐵幢浦幢制首圓如杵徑七八寸出土三尺餘趾限土中故老相傳初置幢時塘尚未就慮潮撼幢用鐵輪護其趾以鐵絙貫幢幹而維絙於石礎然後實土築塘故幢出土上宋咸淳間安撫趙與憲作亭覆之幢本有三其一在舊便門街東南小巷今巷尚名鐵箭一在舊薦橋門外皆湮沒不可見僅存在利津橋者近有指此幢為即錢王鐵箭以幢首為箭鏃不思王射潮時箭已逐潮去烏能存此且王雖英武射潮而潮却特一時精誠所感豈有異於常箭哉又有以幢首可撼不可拔為神不察其下

本有關鍵故也乃惑於夷堅志所云矢拔則龜目紅尤謬

臣謹按徐辨甚明據此則箭所止處亦當在江心不當於岸上立幢以為識備史之言恐未足信也

錢塘江

在縣東南萬厯錢塘縣志本名浙江

虞喜志林云潮水投山下折而曲盧肇曰浙者折也潮出海曲折而倒流也一名浙河山海經禹治水至於浙河又名漸江水經漸江水北過餘杭東入於海又名曲江枚乘七發觀濤於廣

陵之曲江又名羅刹江以江心有羅刹石故云
今稱錢塘江因縣得名漢書朱雋封錢塘侯注
錢唐記云郡議曹華信作塘以捍海潮募人致
土石一斛與錢一千塘成遂名錢塘

國朝康熙二十八年春

聖祖仁皇帝南巡

御製渡錢塘江詩

雪後春煙漠漠浮揚鈴擊楫向中流江通潮汐分吳

地路入溪山隱越州振武戈矛皆駐馬

憶用武時大兵屯駐江干

省方旂葆此乘舟風帆沙鳥看何限遠近雲霞望裏

收

乾隆十六年三月初六日

皇上巡幸紹興東渡錢塘

御製渡錢塘江詩

斛土千錢詭就塘風恬日暖綵舟方一江吳越分
疆界三月煙花正艷陽航葦誰曾見神異射潮未

免話荒唐漲沙南徙民居奠

海潮向逼北岸海寧仁和二邑塘工頗以

為患近年來北岸漲沙潮沙南徙遂慶安瀾

永賴神庥敬倍常

蕭山

在錢塘江東亦名蕭然山名勝志云晉

許詢築室於此有蕭然自適之樂遂名唐天寶

中改永興縣為蕭山縣倚山瀕江江岸有西興

關舊名西陵吳越時改曰固陵後更名西興蘇

軾詩為傳鐘鼓到西興是也

御製蕭山道中作

溪窄綠塍闊水肥烏榜輕開篷畫瓦蒨掛席剪澄
明南國春方麗越天雲復晴山行指明日已是鏡
中行

錢清江 在蕭山縣東漢劉寵為會稽郡守有
惠政將去郡父老各持百錢以送之寵選受一
錢投之於江江水遂清因名錢清江岸有劉寵
祠後人建一錢亭邨民聚居於此曰錢清鎮

御製錢清鎮詩

循吏當年齊國劉大錢留一話千秋而今若問親
民者定道一錢不敢留

柯亭 在山陰縣西三十里太平寰宇記云千
秋亭一名柯亭漢蔡邕宿此亭仰觀椽竹知有
奇響因取為笛相傳千秋亭漢時名高遷亭今
柯橋寺即亭址也

御製題柯亭詩

陳留精博物椽竹得奇遭昔已思邊讓今兼傳伏

滔琴同識焦爨劍比出洪濤漢史無能續千秋恨
董逃

大禹廟 在會稽山大禹治水由浙河乘航至
會稽會諸侯於塗山執玉帛者萬國因名禹航
杭郡之得名始此後葬會稽山窆石尚存窆石
之左即為廟嘉泰會稽志云少康立祠於陵所
梁時修廟惟欠一梁俄風雨大至湖中得一木
取為梁即梅梁也歷代遣官告祭

國朝康熙二十八年春

聖祖仁皇帝南巡

特幸會稽

親詣陵廟致祭

御製謁大禹廟詩

古廟青山下登臨曉靄中
梅梁存舊蹟金簡紀神功
九載隨刊力千年統緒崇
茲來薦蘩藻瞻對率羣工
御題扁額曰

地平天成

御書聯句云

江淮河漢思明德

精一危微見道心

俱奉懸廟中增葺祠宇置守祠生二人雍正七
年欽奉

世宗憲皇帝諭旨重加修葺敬謹防護乾隆十六年三

月初八日

皇上省方幸浙

親詣禹陵致祭

御題正殿之額曰

成功永賴

御書聯句云

績奠九州垂萬世

統承二帝首三王

御製謁大禹廟恭依

皇祖元韻詩

展謁來巡際

憑依對越中傳心真貫道底績莫衡功勤儉鴻稱永

儀型

聖度崇深惟作民牧益凜亮天工

臣 沈德潛恭和 元韻

祖德尊前聖由來執大中平成萬古事勤儉一王功
石神靈閼稽山展謁崇後先其揆一兢業代天

工

御製禹廟覽古詩

得涖稽山峻言瞻禹廟崇碑文擬衡嶽井穴達龍
宮問訊傳工部棲遲遇義公錞于尋豈在窆柱恨
難窮帆石終隣誕梅梁久付空惟應敷土迹天地
並鴻功

臣 錢陳羣恭和 元韻

作鎮稽山重編書夏德崇龍蛇疑古壁枯栢問

元宮獨上吟韓子南登紀史公錫圭瞻莫並乘
載溯難窮殿擁江雲碧樓懸海月空我

皇勤府事萬世有同功

山陰 在會稽山之陰故曰山陰秦置為縣王
獻之云從山陰道上行山川自相映發使人應
接不暇顧愷之曰千巖競秀萬壑爭流草木蒙
籠其上若雲興霞蔚

國朝康熙二十八年

聖祖仁皇帝御製山陰詩

灌木叢篁傍水幽
澹煙晴日漾芳洲
蘭橈搖過山陰道
在昔人傳鏡裏遊

乾隆十六年春

皇上御製舟泛山陰溪路詩

棹入煙花浦
山迎綵鷁舟
桃霞烘日重
柳線曳風柔
應接真無暇
清明適與謀
若耶知不遠
且遲命清遊

蘭亭 在山陰縣西南二十五里水經注所稱

蘭上里也一名蘭渚輿地記云山陰郭西有蘭

渚渚上有亭晉王羲之與謝安孫統輩四十一

人修禊於此人各賦詩羲之為序書法精妙真

蹟藏其十世孫智永處唐太宗用房元齡言令

蕭翼以計取之遂入昭陵自後輾轉臨摹真偽

莫辨

國朝康熙三十四年

聖祖仁皇帝

御書大字蘭亭序

特命刑部員外郎宋駿業恭摹勒石建亭其處重修蘭亭置右軍祠堂於亭後古蹟一新乾隆十六年春

皇上省方南巡

親祀大禹陵禮成

臨幸蘭亭

御製蘭亭卽事詩

向慕山陰鏡裏行清遊得勝愜平生風華自昔稱
佳地觴咏於今紀盛名竹重春煙偏淡蕩花遲禊
日尚敷榮

時三月八日

臨池留得龍跳法聚訟千秋不

易評

又

御製蘭亭恭詠

皇祖撫帖御筆

真贗操戈互詆攻

聖多能以不同同右軍設使瞻

仙藻定早傾心拜下風

又

御製蘭亭雜咏詩

竹逕延緣勝賞探流觴曲水綠波涵何妨修禊日

過五且喜行春月正三

即景還思晉永和崇山真見綠嵯峨斯人不祇清

談輩誓墓高風有足多

絲竹雖無琴筑環逸情真可傲東山中郎若復相
衡量賸有蘭亭在世間

真蹟當年付老僧賺來蕭翼許多能若方吐哺周
公旦房相掄賢未足稱

臣沈德潛恭和 元韻

峻嶺崇山取次探清流隨路鏡光涵兒童也愛

秉藺節共說今朝三月三

花放鶯啼日影和雲開漸露綠嵯峨眼中應接
真無暇一路名山轉厭多

觴詠賓朋水次環右軍禊帖重名山昭陵玉匣
歸藏後真贋紛紜滿世間

話舊相逢鶴髮僧

先皇遺事

聖多能空山揮灑蘭亭序虎卧龍跳萬口稱

三月初九日

駕回杭州西渡錢塘

御製自紹興一日渡江至聖因行宮詩

朝辭餘暨暮錢塘片刻長江穩渡航未免情殷戀
西子不殊風便送滕王快晴乍覺烘山翠弦月遙
疑釣水光十畝行宮遊不足憩閒命筆玉蘭堂

臣謹按吳越春秋餘杭本於越地秦漢時與會稽同隸為郡故越中山水皆與西湖脉絡相聯

恭逢

皇上巡幸會稽山

駕由西湖早發

回鑾一日渡江復

駐蹕西湖伏讀

御製紹興諸詩皆自西湖信宿而成即同西湖之作

聖澤不獨餘杭形勝慶千載一時之隆遇云

西湖志纂卷六

欽定四庫全書

西湖志纂卷七

大學士梁詩正等輯

北山勝蹟上

出湧金門而北合錢塘門迤西過石函橋至
寶石山為北山總路

豐樂樓 在湧金門外稍北西湖遊覽志宋初
名衆樂亭尋改聳翠樓政和間易今名淳祐九

年安撫趙與憲重構瑰麗崢嶸元末燬明嘉靖
二十年郡守陳仕賢毀柳洲寺重建為賓使館
題曰柳洲別館館後有樓題曰豐樂存舊跡也
錢塘縣志今為民居

溜水閘 在湧金門北浙江通志明成化十二
年建水門引湖水入城置鐵窓櫺隔限內外建
閘以時啓閉

柳洲寺 在湧金門北咸淳臨安志開寶間建

本名資福院旁有通元菴五龍王祠開禧元年
趙師霁併為柳洲寺旁為黑亭子灣

關帝廟 在黑亭子灣西湖遊覽志即宋環碧
園故址也旁有呂仙祠

龍王堂 在黑亭子灣久圯四朝聞見錄出豐
豫門入柳洲有五龍王祠開禧中帥臣趙師霁
重塑五王像冕旒珪服至今尚存咸淳臨安志
沈公井水口在豐豫門外龍王祠前分入

臣謹按越絕書云子胥水仙也唐時累封王爵因號水仙王廟在吳山蘇軾有開湖禱吳山水仙伍龍王廟文又有謝吳山水仙伍龍王祝文後人訛伍為五建祠柳洲始建月日無攷咸淳志稱開禧中趙師霁併五龍王祠入柳洲寺聞見錄又云重塑五王像當是師霁併舊祠而易以新祠重為塑像遂稱龍王堂沈公井水口即其處

錢塘門 瀕湖西湖遊覽志宋時所築因錢塘

舊縣治近此門得名萬厯杭州府志錢塘縣治漢魏時在靈隱山麓後徙錢湖門外唐武德四年徙錢塘門內宋南渡後徙紀家橋華嚴寺址

明洪武九年徙今處

白龜池

在錢塘門內城下西湖遊覽志表廣

四畝許池底通西湖唐郭侯李泌所鑿

黑亭子

在錢塘門城下迤南西湖遊覽志舊

有水溝透城通柳洲寺

演武場

在錢塘門內城下西湖遊覽志即宋

時景靈宮及錢塘縣治故址元時改為教場浙

江通志明因之每歲撫按操演官軍於此西倚

城東南北三面繚以垣墉廣袤三百一十六丈
東南為門二中為演武堂

國朝設滿漢駐防官兵遂為駐防營較閱之所康

熙四十二年

聖祖仁皇帝御製閱浙江駐防將士射詩

羽林舊將分防重吳越名區古要疆講武正宜清晏
日人人自擅技穿楊

乾隆十六年三月初十日

上親閱滿漢官軍騎射

賞賚有差

御製閱杭州旗兵詩

承平世恐軍容弛文物邦應武備明已向會稽陟

禹蹟便教浙水詰戎兵羽林舊將今誰是

祖駐蹕皇

杭州閱武詩有羽林舊將分防重之句

七萃材官古莫衡四十年重

逢盛典行間踴躍倍常情

玉蓮堂 在錢塘門外西湖百詠序舊在郡治

教場南景定三年移此額曰一清後以堂外多
白蓮復揭玉蓮舊額西湖遊覽志明嘉靖二十
一年按察僉事劉望之建賓館於此里人稱月
牙公館

菩提院 在錢塘門北西湖遊覽志院本錢惟
演別墅捨以為寺有白蓮綠野等堂碧玉四觀
披顥等軒南漪迎薰澄心涵碧玉壺雪糴榆等
亭後併入昭慶寺

南漪堂 在錢塘門外菩提西寺西湖百詠序

蘇軾詠南漪堂杜鵑花詩即此後為玉壺園西

湖遊覽志本廊王劉琦別業後為理宗御園今

廢

望湖樓 在昭慶寺前一名先得樓武林舊事

錢忠懿王建先得樓即望湖樓

蘇軾望湖樓詩

山白雨跳珠亂入船捲地風來忽吹散望湖樓

下水如天又放生魚蟹逐人來無主荷花到處

開水枕能令山俯仰風船解與月徘徊又未成

小隱聊中隱可得長閑勝暫閒我本無家更安

往故鄉無
此好湖山

昭慶寺 在溜水橋西咸淳臨安志乾德五年

錢氏建名菩提院太平興國三年建戒壇七年

改今額西湖遊覽志南渡後以其地為策選鋒

軍教場僅存戒壇尋復為寺元末燬洪武間重

建留青日札嘉靖三十五年倭寇占為巢窟都

御史李天寵焚之寇平總制胡宗憲重建

國朝康熙五十二年重修乾隆十六年三月初十

日

聖駕臨幸

御題佛殿扁額曰

深入定慧

御製昭慶寺詩

招提湖北角閱武便曾過碧篆消新火青松擎老
柯客心惜類廢僧意冀檀那欲擬從其願民財慮
費多

古柳林 西湖遊覽志在昭慶寺東

雲洞園 咸淳臨安志在古柳林楊和王存中
園直抵北關最為廣袤築土為洞中通往來上
有堂曰萬景天全旁有亭曰紫翠間可容遠眺
桂亭曰芳所荷亭曰天機雲錦皆絕勝處西湖
遊覽志上有麗春臺青石為坡不斲礮齒春時
麗人歌舞得上坡者賞內有方壺灑碧濯纓五
色雲等亭玉瓏金粟天砌等臺洞戶輝煌花木

叢蔚壯麗無比今廢

石函橋 一名西石頭橋在昭慶寺東西湖遊
覽志唐刺史李泌建有水閘泄湖水以入下河
沿東西馬塍羊角埂至歸錦橋凡四派橋北舊
有梅岡園謝府園萬花小隱園一碧萬頃堂又
有錢塘尉司相傳王子高舊宅宋隆興間建仁
宗嘗覽西湖圖曰真仙尉也遂建真仙亭蘇軾
常率賓僚遊焉建英遊閣林逋訪謝尉賦秋水

芙蓉詩建詠物樓並皆不存

白公隄 在錢塘門北由石函橋北至餘杭門

築以蓄上湖之水漸次以達於下湖唐書白居易

易傳居易外遷杭州刺史始築隄捍錢塘湖

臣謹按此隄當名白公隄實白公所築與白沙隄不相涉今石函橋外隄迹猶存而白公之名

混竟

溜水橋 在羊坊巷北西湖遊覽志洩湖水以

入下河可通新河壩

小溜水橋 在昭慶寺北西湖遊覽志俗稱水

磨頭其下為棕毛場

棕毛場一稱松木場

石函三閘 在昭慶寺東西湖遊覽志三閘一

名聖塘閘一名澗水閘一名石函閘三閘中水流入桃花港直至松木場而分流入北關大河又自聖塘閘分一支沿西城河至西湖壩止

昭慶廣濟橋 在昭慶寺前

保安橋 在霍山廟巷口

羊坊橋 在霍山大路口西湖遊覽志宋時滌
羊之所其西為古柳林

慶忌塔 在昭慶寺北西湖遊覽志春秋時吳

慶忌居此宋為廣儲倉基前有石池深不可測

臣謹按舊志稱慶忌謂即吳公子錢塘志已據
白澤圖辨之云慶忌水怪名故作塔於池上以
壓勝其說近是惟云此塔與大佛寺前之塔皆
壺瓶式為元時西僧據據所造今湖中三塔與
此式同則宋以前已有之考吳越錢王俶造寶
塔四面各有寶字此塔亦有之郡人吳農祥斷
為吳越時建
非臆說也

霍山 在寶石山北咸淳臨安志於湖北諸山
最小山形多骨石筍鱗起

廣惠廟 在霍山坊成化杭州府志按宋會要
神姓張名渤血食廣德軍之祠山有禱即應屢
著靈異康定元年封靈濟王崇寧三年賜廟額
曰廣惠累封至正昭顯威德聖烈王寶祐丁巳
改封真君祠創於乾道庚寅越二十有五年紹
熙甲寅始成景定二年安撫洪燾咸淳四年安

撫潛說友前後葺治舊稱霍山廟

靈衛廟 在小溜水橋北俗稱金祝廟咸淳臨

安志建炎三年十二月完顏宗弼犯境守臣康

允之退保赭山錢塘縣令朱蹕率民兵逆戰傷

甚猶叱左右負以擊賊遂遇害時尉曹將金勝

祝威亦以力戰歿鄉民瘞二人於錢塘門外因

立祠曰金祝二太尉廟淳祐十年賜廟額曰靈

衛景定二年封忠佐忠佑侯咸淳二年封朱令

為顯忠侯四年安撫潛說友建廟設蹕中坐而
坐勝威於東西廡成化杭州府志洪武四年禮
部議三人以死勤事宜在祀典稱宋錢塘令朱
公之神宋尉曹將金公祝公之神祭以每歲七
月初一日

羊角埂 在溜水橋北咸淳臨安志自柴場至
乳臺渡口延袤十餘里界於東西馬塍之間其
形灣曲如羊角然

東西馬塍 夢梁錄吳越王牧馬於此其馬蕃
息號為馬海咸淳臨安志其土極細宜花園丁
種花以賣都城四時之花皆取於此

茵閣 成化杭州府志在西馬塍元句曲外史

張雨故居

張雨馬塍新居詩浮家泛宅意何如
玉室金堂計未疎歸錦橋邊停舫子
散花灘上築樓居澹然到處自鑿井元晏閉門
方著書但得草堂資便足人間何地不樵漁

梅莊 咸淳臨安志在西馬塍蘄王韓世忠園

有堂曰樂靜曰清風皆高宗書賜又有水閣梅

坡芙蓉堆凡四時花木皆有亭

馬塍廟 在溜水橋錢塘縣志祀宋馬雄馬武
世傳二人東西居共為田園之塍故名明屠隆
廟記云宋乾德間僧雪巖建歲豐禪院治平中
改寶覺豐樂寺後燬僅存二祠槩名曰馬塍廟
以奉土穀之神

寶石山 在石函橋西咸淳臨安志高六十三
尺周迴一十三里一百步北有落星二石吳越

王錢氏號壽星寶石山封為巨石山

臣謹按巨石山又名石甌山隋書地理志錢塘有石甌山是也

寶所塔 在寶石山武林梵志塔院名聖壽禪

寺咸淳臨安志舊為應天塔極樂菴西湖遊覽

志寶所塔吳越王之臣吳延爽者迎佛舍利建

塔於山頂附以佛廬宋開寶初賜額曰崇壽院

咸平中僧永保修人以師叔稱之遂名保叔塔

元延祐中燬僧可周重建至正又燬僧慧炬重

建塔門舊有張即之書湖山勝概四字今移置
淨慈寺成化間復燬弘治間僧可勝重建一夕
雷震塔圯正德九年僧文鏞重建又構西方殿
於塔後挹涼亭於山下嘉靖元年塔復燬二十
三年僧永果重建

臣謹按湧幢小品云杭州保俶塔因錢俶入朝
作此保之稱俶者君前臣名也今誤為保叔霏
雪錄云寶所塔俗誤為保叔塔謂搜造此塔祈
冥福以庇小郎鄉曲附會如此二說各異西湖
遊覽志既仍寶所之名而復沿永保之說奚所
折衷竊意錢氏封石甌山為寶石其旁復有寶

稷山寶雲山皆因寶石而得名者則建塔自應以寶所名之不待永保重修始以保叔稱也故取霏雪錄以正之

壽星石 西湖遊覽志一在塔後一在看松臺

下各大數十圍塊然無根望之如斷舊名落星

石吳越錢王改今名

石屏峯 在寶石山 西湖遊覽志以形似名下

有石屏院今廢

獅子峯 在石屏峯西西湖遊覽志一名巾子

峯林逋詩巾子峯頭烏柏木微霜未落葉先紅
是也

看松臺 去崇壽院百步許西湖遊覽志俯臨
巨壑凌駕松杪松下有石圓如墜星

乳泉 去看松臺百步許泉白而甘

一勺泉 在崇壽院右壁

來鳳亭 寶石山形若翔鳳寶所塔在其巔宛
如鳳味塔下舊有天然圖畫閣久圯雍正九年

建亭曰來鳳故有寶石鳳亭之目乾隆十六年

御製來鳳亭詩

見恭紀
名勝

自寶石山而西沿後湖至玉泉為北山西路

寶稷山 在寶石山下萬厯杭州府志絕頂為

寶峯

石佛山 舊傳即秦始皇纜船石咸淳臨安志

陸羽武林山記云秦皇纜船石俗呼西石頭舊

傳西湖本通海東至沙河塘向南一岸皆大江

也故始皇纜舟於此

臣謹按西湖通江之說遊覽志已言其非國朝毛先舒亦辨之詳矣但山川陵谷遷徙不常而江湖脉絡實相貫注如當時靈隱山直抵江干故唐人有曾過靈隱江邊寺之句是水經注所云始皇至會稽道餘杭之西津西津正未必不指西湖纜船石之稱相傳已久是否亦不必深論也

大佛寺 即石佛山西湖遊覽志宋宣和中僧

思淨兒時嘗見之作念曰異日出家當鐫此石為佛及長為僧妙行寺遂鐫石為半身佛像七

年乃成飾以黃金構殿覆之遂名大石佛院元至元間燬像亦剝落明永樂間僧志琳重建為大佛禪寺寺畔有塔俗稱壺瓶塔元時西僧所建

沁雪泉 在大佛寺石壁下宋棠陵方思道題相巖院 在大佛寺右武林舊事晉天福二年錢氏建上有十三間樓蘇軾守杭日嘗治事於此

顯功廟 在大佛寺西咸淳臨安志神姓岳名
琚家霍山為臨安府吏建炎間金人犯境神輸
家財募勇士三百人推錢塘尉曹將為首迎敵
死戰間境以安里人懷其功即四聖延祥觀祠
祀之號寶稷山王咸淳四年賜廟顯功封忠翊
侯錢塘縣志寶稷山即寶石山

水月園 咸淳臨安志在大佛寺西紹興中賜
楊存中御書水月二字有堂俯瞰平湖水月交

映范成大樓鑰皆有詩

寶雲山 在寶稷山南

寶雲茶塢 在寶雲山宋時種茶之所

葛嶺 在寶雲山石相傳葛洪嘗煉丹於此

智果禪寺 在葛嶺上咸淳臨安志開運元年

錢氏建元祐中重建法堂杭守蘇軾題梁內有

參寥泉西湖遊覽志軾在黃州時夢與僧道潛

參寥賦詩有寒食清明都過了石泉槐火一時

新之句後七年守杭參寥居智果院忽有泉出
石縫間寒食之明日軾訪之孤山汲泉鑽火烹
黃柏茶適符所夢遂名其泉曰參寥作記以銘
之其梁有軾所題元祐五年歲在庚午二月辛
卯朔乙卯上梁二十一字紹興間徙北山有泉
適出仍名參寥其梁亦自孤山移置於此元末

燬明洪武初僧可祥慧炬重建

蘇軾參寥上人
初得智果院詩

漲水返舊壑飛雲思故岑念君忘家客亦有懷
歸心三問得幽寂數步藏清深攬金盧橘瑞散

大楊梅林茶筍盡禪味松杉真法音雲崖有淺井玉醴常半尋遂名參寥泉可濯幽人襟相攜橫嶺上未覺良年侵一眼吞江湖萬象涵古今願君更小築歲晚解我簪

國朝順治間重建

錦塢 在智果院前寶雲山下西湖遊覽志塢中舊多花卉開時如錦塢西舊有治平寺玉清宮雲巢樓並廢

葛翁井 在智果寺西南西湖遊覽志上方下圓相傳葛稚川投丹之所今在馬氏園宣德間

大旱甃而涸之得石匣一石瓶四匣固不可啓
瓶有丸啗之絕無味乃棄之有漁人獨啗一丸
年百有六歲井遂淤惡不可食仍以匣投之甘
冽如故

初陽臺 在寶雲山頂西湖遊覽志相傳葛洪
修真於此吸日月精華其地高朗宜遠矚可觀
日出錢塘縣志舊傳每歲十月朔旦見日月並
升下有浴日泉今為葛仙翁祠

雪莊 在葛嶺下舊有宋時石仙人八座因名
八仙莊後石仙移置通元觀今為海寧許氏別
業更名雪莊

丹井山房 在葛嶺下有屋數楹面臨方井色
白味甘深廣各文餘傳是葛洪丹井元張伯雨

詩一宿葛洪丹井上指此後為前御史顧豹文

別業

杭世駿丹井山房詩相逢猿鶴亦比鄰
澹裏溪山花外身招得林逋為主客一枝秋

影拜詞人又三間黃篾稱間居
板輿比似橫山潭畔路居民猶說顧尚書

天香書屋 在丹井右前明翁開之別業中有
湛華亭亭前老桂干霄香飄雲外皆開之手植
曾孫嵩年任廣東提學副使構天香書屋奉

聖祖仁皇帝御書朱子詩及臨董其昌書勒石建亭其
處

瑪瑙講寺 在寶雲山咸淳臨安志開運三年
錢氏建治平二年改賜今額寺舊在孤山紹興
二十二年以其地為延祥觀而徙寺於葛嶺之

東紹定六年創高僧閣淳祐八年安撫趙與憲
重建西湖遊覽志元末燬明永樂間重建陟山
之巔石磴數百級有閣凌雲特起憑眺最勝世
稱瑪瑙山居者是也

國朝順治間重修

後僕夫泉 在瑪瑙寺後西湖遊覽志先是智
圓居孤山僕夫藝竹得泉號僕夫泉後徙寺於
此藉葛井以汲寺僧艱之元僧芳洲鑿池得此

遂名後僕夫泉

寶雲菴

在瑪瑙寺西久圯西湖遊覽志宋乾

德二年建名壬光王寺雍正二年改今額內有

清軒月窟澄心閣南隱堂皆不存

蘇軾次寶雲菴僧仲殊雪

中遊湖韻詩寶雲樓閣開十門林靜初無一鳥喧閉戶莫教風掃地捲簾疑有月臨軒水光潏潏猶浮碧山色空蒙已欲昏乞得湯休奇絕句始知鹽絮是陳言

褒忠祠

在瑪瑙寺左錢塘縣志明正統間監

察御史夏誠隨駕北狩殉土木之難舊有像附

揚清祠

國朝康熙五十六年移建於此題曰褒忠春秋致

祭

惠獻貝子祠 在葛嶺前瀕湖祀寧海將軍固

山貝子福臘塔康熙十三年耿逆犯順兩浙騷

動貝子奉

命督師有全台保浙功未幾克復全閩綏靖東南薨逝

賜謚惠獻浙民祠於湖上

小輞川 在葛嶺下前少詹事邵遠平別業中
為堂三楹奉懸

聖祖仁皇帝所賜

御書蓬觀二字後為三弘一致堂祀其祖經邦像經邦
當明嘉靖間以直言譴戍著有弘道弘毅弘簡
三錄建樓貯焉庭有古桂四株連蜷偃蹇舊志
稱萬厯間參政吳大山致仕歸築室湖濱手植
老桂修篁顏曰輞川即其處也

邵遠平小輞川
詩卜築城西路

霏微積翠環忠魂棲聖水大業副名山老桂香
逾烈修篁淚已斑柴門清絕處猶似不關關自
注先祖司權荊州三月而額稅已足
任人往來不征商稅民稱曰不關關今入惠獻

貝子祠內

清隱菴 在葛嶺即古招賢寺咸淳臨安志唐

德宗朝郡人吳元卿為六宮使棄官參鳥窠禪

師建菴修道即會通禪師也開運三年錢氏建

院名禪宗原名招賢寺西湖遊覽志內有井曰

蒙泉東坡書扁又有山花一樹色紫極香人不

識名白樂天名為紫陽花

白居易招賢寺題紫陽花詩何年植向仙

壇上早晚移栽到梵家雖在世間人不識與君名作紫陽花

錢塘縣志元末

燬

國朝康熙十五年僧起綱重建

壽星院

在葛嶺上久圯咸淳臨安志天福八

年建有盃泉靈泉寒碧軒此君軒西湖遊覽志

上有閣曰江湖偉觀蘇軾守杭日入門即悟前

身曾到歷言院後殿閣及山石之名無一遺謬

故湖中詩多咏此

蘇軾次韻周長官壽星院詩
琉璃百頃水仙家風靜平湖

簪鈿丰采歷疎松歌晚照伶俜寒蝶抱秋花困
眠不覺依前榻歸路相將踏桂華更著綸巾被
鶴筆他年應作畫圖誇又寒碧軒詩清風肅肅
搖空衆窓前修竹一尺圍紛紛蒼雪落夏簞冉
冉綠露沾人衣日高山蟬抱葉響人靜翠羽穿
林飛道人絕粒對寒碧為問鵝骨何緣肥又此
君軒詩臥聽設設碎龍鱗俯看蒼蒼立玉
身一柄鵝夷江海去尚餘君子六十人

福地院

在葛嶺初陽臺下久圯

即集芳園故址宋紹興間收屬官家有蟠翠雪
香翠巖倚秀挹露玉蓋清勝諸扁皆高宗所題

淳祐間理宗以賜賈似道改名後樂園元大德
初僧滿月即廢址改建趙孟頫為記至正末燬
旁有香月隣廖瑩中園後歸似道並廢

寶巖院 在葛嶺上久圯西湖遊覽志後唐天

成二年錢氏建舊名垂雲治平二年改今額元

豐間僧清順作垂雲亭又有借竹軒秦觀少游

宿此夢天女以維摩求讚理宗書無量福海於

佛閣

蘇軾僧清順新作垂雲亭詩江山雖有餘
亭謝著難穩登臨不得要萬象各偃蹇惜

哉垂雲亭此地得何晚天工爭向背詩眼巧增
損路窮朱闌出山破石壁很海門浸坤軸湖尾
抱雲嶽蔥蔥城郭麗淡淡煙村遠紛紛鳥雀去
一一漁樵返雄觀快新獲微景收昔邇道人真
古人嘯咏慕稽阮空齋臥蒲褐芒屨每日捆天
憐詩人窮乞與供詩本吾詩久不作荒謔旋鋤
壑從君覓佳句
咀嚼廢朝飲

虎頭巖 在葛嶺西湖遊覽志山形突出若
虎頭然相傳吳越盛時望氣者云吳越有王氣
命鑿而斷之

鳳林禪寺 在葛嶺西俗稱喜鵲寺西湖遊覽

志唐烏窠禪師道場也師名圓修居此四十餘年有大松樹盤屈如蓋師棲息其上復有鳥馴擾構巢於側人遂稱為烏窠禪師明宣德間僧如月重建勅名鳳林寺圓修骨塔存焉

洪忠宣祠 在葛嶺下錢塘縣志祀宋洪忠宣

公皓皓建炎初使金不屈十五年放歸賜第西

湖葛嶺後遂祠焉元末燬明嘉靖中總督胡宗

憲即故址重建

董其昌洪忠宣祠柱聯身竄冷山萬死持回蘇武節神依葛嶺

數椽隣近
鄧王墳

李文襄祠 在葛嶺下祀故文華殿大學士謚
文襄前浙江總督李之芳康熙十三年總督浙
江當閩逆之變移鎮三衢扼險爭要或剿或撫
浙東郡縣賴以安堵士民德之逆平入為兵部
尚書進大學士雍正八年建祠

陳忠肅祠 在葛嶺下祀宋贈太師陳文龍明
正德間建堯山堂外紀宋景炎初興化軍降元

文龍被執不屈死墓在智果寺旁

永賴祠 在葛嶺之西俗稱龐公祠萬厯杭州
府志嘉靖四十四年龐尚鵬以監察御史按浙
行均平條鞭法士民德之萬厯十三年創祠致
祭尚書張瀚為記三十八年督學陳大綬題額
曰永賴祠

關帝廟 在跨虹橋北岳王墳左錢塘縣志明
萬厯十五年建尚書張瀚為記

陳繼儒棲霞嶺
關帝廟柱聯德

必有隣把臂呼岳家父子忠
能擇主鼎足分漢室君臣

履泰山 在葛嶺西

棲霞嶺 在履泰山上多桃花色絢如霞下有

水一道名桃溪經湖山神廟入湖

紫雲洞 在棲霞嶺側西湖遊覽志去妙智菴

數百步有洞倚空如懸清涼無暑

乾隆十六年春

聖駕回鑾補題西湖畫冊

御製紫雲洞詩

窈窕紫雲洞聞在葛嶺西琤琮乳竇水流出是桃
溪

古劍關 在棲霞嶺上左竇雲右仙姑兩山夾
峙若劍門然咸淳臨安志宋立巡司於此下有
牛車墓畢字伯遠汝州魯山人為岳武穆部將
累立戰功轉寧國軍承宣使紹興十七年遇毒
卒蓋檣使人酖之云景定初追封輔文侯

妙智菴

在棲霞嶺西湖遊覽志即牛舉香火

院

白沙泉

在棲霞嶺後

棲霞洞

在棲霞嶺之巔妙智菴側萬厯杭州

府志地多巖石其中穹然如厦屋雙巨石相倚

如閉閣每風從南來豁豁而出淒神寒骨故暑

遊最勝仰視左竇四五豁然通明大者圓徑丈

許嘉木當前如月中桂小者星列自相附屬出

洞西北行百餘步有水一泓深不可測極甘冽
烏石峯 在紫雲洞上石色如墨故名

金鼓洞 西湖遊覽志棲霞嶺北有金鼓洞昔
人伐木其間聞金鼓聲作乃止

乾隆十六年春

聖駕回鑾補題西湖畫冊

御製金鼓洞詩

棲霞嶺迤西嵌壁多崖洞是間名金鼓壯哉特異

衆武穆孤墳近惜未中興宋所恨和議行敵人反
間縱山林思作氣高孝獨無慟過祠留句曾撫畫
興懷重

忠烈廟 在棲霞嶺下俗稱岳王廟萬厯杭州

府志祀宋少保岳武穆王飛

宋史岳飛傳飛進軍朱仙鎮烏珠遁

還汴京自燕以南金號令不行欲僉軍以抗飛河南無一人應者飛語其部下曰直抵黃龍府與諸君痛飲耳方指日渡河而檣欲割淮以北棄之乃先召張浚楊沂中歸而後言飛孤軍不可久留乞令班師一日奉十二字金牌飛憤惋泣下東向再拜曰十年之力廢於一旦飛既歸

所得州縣旋復失之明年烏珠破濠州張浚駐軍黃連鎮不敢進揚州中遇伏而敗帝命飛救之金人聞飛至又遁烏珠遺書曰汝朝夕以和靖而岳飛方為河北國必殺飛始可和檜亦以飛不死終梗和議與中奏何鑄侍御史羅汝楙交章彈論謂金人攻淮西飛略去舒蘄而不進比與張浚按兵淮上又欲棄山陽而不守又許張浚令劫王貴驕王俊誣告張憲謀還飛兵柄檜遣使捕飛父子證張憲事飛笑曰皇天后土可表此心初命何鑄鞠之飛裂裳以背示鑄有盡忠報國四大字深入膚理因質無左驗改命万俟卨為傳會其獄歲暮獄不成檜手書小紙付獄即報飛死年三十九子雲棄市

王誣死後孝宗為雪其冤

改葬於棲霞嶺復官賜諡武穆廢智果院為祠

賜額曰褒忠衍福寺墓木皆南向寶慶二年改
諡忠武嘉定四年追封鄂王宋亡寺廢六世孫
士迪重建未幾復廢元至元間天台僧可觀訴
於官復之廟有王像以其子雲雷震霖霆祠焉
後作寢堂像王夫人與其女號銀瓶娘子者至
正中加號保義尋燬洪武四年正祀典稱宋少
保武穆岳鄂王即寺址復建祭以歲十二月二
十九日景泰間修飭祠墓賜春秋祀及忠烈廟

額弘治間重建寢殿廟右有流芳亭刻王遺像
於石復肖王夫人子女遺像於後寢扁曰一門

忠孝

趙孟頫岳王祠詩岳王墳上草離離秋日荒涼石獸危南渡君臣輕社稷中原父老

望旌旗英雄已死嗟何及天下中分遂不支莫
向西胡歌此曲水光山色不勝悲于謙岳王祠
詩匹馬南來渡浙河汴城宮闕遠差我中興諸
將誰降敵負國奸臣主議和黃葉古祠寒雨積
青山荒塚白雲多如何一別
朱仙鎮不見將軍奏凱歌

國朝順治八年巡撫范承謨重修日久殿宇傾圯
康熙五十四年總督范時崇檄縣重建雍正九

年總督李衛重修并建石坊於祠前甬道題曰
碧血丹心乾隆十六年三月

聖駕駐蹕西湖

臨幸廟中

賜祭一壇

御題廟額曰

偉烈純忠

御製岳武穆墓詩

讀史常懷忠孝誠重瞻宰樹拱佳城莫須有獄何
須恨義所重人死所輕梓里秋風還憶昨去歲巡
豫過湯
陰乃其
故里石門古月鎮如生夜臺猶切偏安憤想對
餘杭氣未平

臣 沈德潛恭和 元韻

報國忘軀矢血誠誰教萬里壞長城十年憤積
龍沙遠一死身嫌泰岱輕自願藏弓維弱主何
來叩馬有書生於今墓畔南枝樹猶見忠魂怒

未平

啓忠祠

在忠烈廟西祀武穆王考妣始建年

月無考

宋史岳飛傳父和能節食以濟飢者有耕侵其地割而與之賞其財者不責償

飛未冠挽弓三百勛弩八石學射於周同盡其術能左右射同死朔望設祭於其家父義之曰汝為時用其殉國死義乎

紹興五年母封國夫人

翊忠祠

在忠烈廟西萬厯杭州府志祀宋施

全劉允升全宋殿司小校也憤檜誤國挾刃刺之不中磔於市允升建州布衣也聞岳武穆被

逮詣闕上書訟其冤檜大怒下棘寺論死邦人
重其義因並祀之獄卒隗順痛武穆冤死負屍
潛瘞後孝宗購求勅葬皆順之功萬曆三十年
布政使范淦并祀之工部主事施浚明為記

岳墳檜 在岳墓前太平清話其樹為雷火所

劈天順時杭州郡丞馬偉圍以石欄謂像檜分
屍狀名分屍檜至今猶活西湖遊覽志前有石
壁大書盡忠報國四字字徑五尺餘

掃帚塢 在棲霞嶺後

黃龍洞 在棲霞嶺後名勝志宋淳祐間有僧
慧開字無門說法吳興之黃龍山後卓錫於此
有石磴砌不合如礪忽然出泉色紺而列入以
為龍隨錫至故名黃龍洞

護國仁王寺 即黃龍祠在掃帚塢西湖遊覽
志宋淳祐間經略使孟珙建賜仁王額延高僧
慧開居之七年旱召開祈雨雨隨至問何時霑

足開對以寂然不動感而遂通是夕大雨嗣是
無雨輒禱禱輒應遂封黃龍為靈濟侯賜額曰
護國龍祠元至正燬明洪武初僧祖吉重建其
東有黃山橋塢內舊有天龍菴永安院西靖宮
並廢

僊姑山 在履泰山西東山街口可通古蕩西
溪西湖遊覽志靈隱山脉至此少伏若斷而連
其旁為桃花街舊有淨勝院俗稱昇仙宮宋時

女僧妙清建高宗常臨觀焉有松曰御愛松

張烈文侯祠 在僊姑山西西湖遊覽志侯名

憲岳武穆愛將也累立戰功紹興十年烏珠頓

兵臨潁憲破其兵追奔十五里中原大振會秦

檜主和班師憲還檜謀殺飛使奸人王俊妄言

憲與岳雲通書謀還飛兵柄鞠煉被掠無完膚

不伏竟坐誣死葬於東山街口景定二年追封

烈文侯元總管夏思忠立石表其墓明正德十

二年建祠修撰唐舉為之記錢塘縣志明末圯
國朝巡撫范承謨即故址重建

青芝塢 在僊姑山西西湖遊覽志塢有五色
土雜銀星者嘗產青芝因名從石板巷入南宋
時繞湖皆市廛故有巷名其前有佛牙塢

玉泉 在淨空院內萬厯杭州府志南齊建元
中靈悟大師曇超說法於此龍君來聽撫掌出
泉今龍祠前小方池深不尋丈清澈可鑒異魚

數百游泳其中旱潦不盈竭流出山外溉田三十餘頃淳祐中趙與憲麓為二池元末院燬而泉如舊嘉靖間郡守陳仕賢為亭其上西湖遊覽志旁一小池水翠綠以白粉投之亦成綠色

白居易玉泉詩湛湛玉泉色悠悠浮雲身閒心對定水清淨兩無塵手把青筇杖頭戴白綸巾與盡下山去知我是何人

細雨泉 在玉泉寺後錢塘縣志泉眼上湧浮激波面每斜風踈點遊人輒驚雨而去故名

勅賜清漣寺 在青芝塢即玉泉寺咸淳臨安志南

齊靈悟大師開山卓錫晉天福三年始建寺名
淨空院咸淳三年重修萬厯杭州府志元末燬
宣德間重建武林梵志萬厯間重修有晴空細
雨扁方伯竇珙書

國朝康熙三十八年三月

聖祖仁皇帝南巡幸寺

御書清漣寺額

御製玉泉有五色魚賜名清漣寺詩

錦鱗游泳漾波紋
隱藻穿蘋暗作羣
濠濮會心原不遠
清漣題額與傳聞

雍正六年重修並建洗心亭於池側
乾隆十六年三月

聖駕臨幸

御製清漣寺詩

見恭紀
名勝

臣 沈德潛恭和 元韻

玉泉吾舊到屈指廿年餘不改清連水常涵金
碧魚滄波搖月影噴沫上霞裾投餌人無羨忘
機爾自如分餐齋鉢粒聽誦梵天書莊叟知魚
樂君真達者歟

靈峯禪寺 在青芝塢後西湖遊覽志舊名驚
峯禪院晉開運間吳越王建延伏虎光禪師居
之宋治平二年改賜今額俗稱為唐時裴休墓
院者非是寺舊有眠雲堂翠微閣洗鉢池妙高

臺並祀

鮑家田 咸淳臨安志在東山街北有玉泉之

水灌溉吳越相鮑君福賜田於此人稱鮑家田

白紙局 西湖遊覽志在玉泉側宣德間置局

就池水造紙紙白而泉濁後局廢泉復洌

神霄雷院 西湖遊覽志宋咸淳間建

西湖志纂卷七